



**CONCELLO DE XERMADE**  
Praza do Concello, s/n  
27833 Xermade (Lugo)  
Tel.: 982 501 001  
Fax: 982 501 027  
[www.concellodexermade.com](http://www.concellodexermade.com)

**ACTA DA SESIÓN ORDINARIA DO CONCELLO PLENO CELEBRADA O DÍA  
TRECE DE AGOSTO DE DOUS MIL QUINCE.**

**ASISTENTES:**

**Presidente:**

D. Roberto García Pernas.

**Concelleiros:**

D. Luis A. Vilasuso Seco  
D. José Prieto Barro.  
D. Carlos Alberto Guerra González.

D<sup>a</sup> Tamara Paz Balsa.  
D. Tomás Rodríguez Arias.  
D. Antonio Riveira Requeijo  
D. Mario Félix García Prieto  
Dna. Isabel Campello Ares.  
D. Óscar González Pardo

Dna. María do Mar Hermida Pico

**Secretaria- Interventora:**

Dna. Ana Elena Fernández del Valle .

No salón de sesions da Casa do Concello de Xermade, sendo as vinte horas do día trece de agosto de dous mil quince, xúntanse, en cumprimento do disposto nos artigos 195 da Lei Orgánica 5/1985 de 19 de xuño de Réxime Electoral Xeral e art. 37.1 do Regulamento de Organización, Funcionamento e Réxime Xurídico das Corporacións Locais, aprobado por RD 2568/86 de 28 de novembro, en sesión ordinaria, primeira convocatoria, previamente convocados para o efecto, os concelleiros/as electos/as relacionados/as na marxe, co obxecto de celebrar sesión ordinaria.  
Foron asistidos pola Secretaria-Interventora do Concello Dona Ana Elena Fernández del Valle .

**1.- APROBACIÓN DO BORRADOR DA ACTA DA SESIÓN ANTERIOR**

O Sr. Alcalde pregúntalles aos señores concelleiros se desexan realizar algunha observación sobre a acta da sesión anterior de data 9 de xullo de 2015, de carácter extraordinario. O voceiro do BNG di que o seu grupo quere facer unha precisión; No punto oitavo, relativo a proposta sobre dedicación parcial, asistencias e dietas cando se fala dos dous traballos que vai desenvolver, se extrapolamos o soldo a unha xornada laboral normal de 40 horas serían uns 3.000 euros cando o salario medio de Galicia é de mil cincocentos euros, o que consideramos excesivo dado que só vai dedicar 25 horas semanais ao concello e non fai uso da redución de xornada que lle permite a lei"

Feitas as oportunas aclaracións, a acta resulta aprobada por unanimidade.

## **2.- INFORMES DE PRESIDENCIA, RESOLUCIÓNS DA ALCALDÍA E ACTAS DA XUNTA DE GOBERNO LOCAL.**

**1º.** De conformidade co disposto no artigo 42 do Real Decreto 2568/86 do 28 de novembro, polo que se aproba o Regulamento de organización, funcionamento e réxime xurídico das entidades locais, dáse conta ós concelleiros das Resoluciós da Alcaldía ditadas entre os días seis (6) de abril ata o seis (6) de agosto de 2015 (nº 119 ó 298 incluídos).

A Corporación dáse por enterada.

**2º.** Coñecidas polos asistentes a través de copias remitidas dáse conta das seguintes actas das sesións da Xunta de Goberno Local: acta da sesións extraordinaria de vinte (20) de xullo de 2015 .

A Corporación dáse por enterada.

**3º.** Por parte da Secretaría-Intervención do Concello ponse en coñecemento do Pleno :

- Con data 20 de abril de 2015 remitiuse o Informe ISPA sobre retribucións do persoal e órganos políticos correspondentes ó ano 2014.
- Con data 23 de abril de 2015 remitíronse os datos relativos ó 1ºT do PMP, de conformidade co artigo 4.1b da Orde HAP/2015/2012 de 1 de outubro, pola que se desenvolven as obrigas de subministro de información previstas na LO 2/2012 de 27 de abril, de Estabilidade Orzamentaria e Sostenibilidade Financeira e de conformidade co establecido na DT única do RD 635/2014 de 25 de xullo, polo que se desenvolve a metodoloxía de cálculo do período medio de pago a provedores das administracións públicas, e as condicións e o procedemento de retención de recursos dos réximes de financiamento, previstos na LO 2/2012 de 27 de abril de estabilidade orzamentaria e sostenibilidade financeira.
- Con data 28 de abril de 2015 remitiuse a execución trimestral do orzamento, 1ºT do 2015, cumprindo ca estabilidade orzamentaria e ca regra do gasto.
- Con data 5 de maio de 2015 remitiuse a liquidación do orzamento 2014, cumprindo ca estabilidade orzamentaria e ca regra do gasto.
- Con data 6 de xullo de 2015 remitíronse os datos relativos ó 2ºT do PMP, de conformidade co artigo 4.1b da Orde HAP/2015/2012 de 1 de outubro, pola que se desenvolven as obrigas de subministro de información previstas na LO 2/2012 de 27 de abril, de Estabilidade Orzamentaria e Sostenibilidade Financeira e de conformidade co establecido na DT única do RD 635/2014 de 25 de xullo, polo que se desenvolve a metodoloxía de cálculo do período medio de pago a provedores das administracións públicas, e as condicións e o procedemento de retención de recursos dos réximes de financiamento, previstos na LO 2/2012 de 27 de abril de estabilidade orzamentaria e sostenibilidade financeira.

- Con data 7 de xullo de 2015 remitiuse a execución trimestral do orzamento, 2ºT do 2015, cumprindo ca estabilidade orzamentaria e ca regra do gasto

A Corporación toma coñecemento.

### **3- APROBACIÓN CONTA XERAL 2014.**

O Sr. Alcalde explica o procedemento a seguir para a aprobación da Conta Xeral, indicando que a mesma foi ditaminada favorablemente pola Comisión de Contas e Facenda de data 27 de abril; exposta ó público e publicada no Boletín Oficial da Provincia de Lugo nº 104, de data 9 de maio, e non houbo alegacións no prazo de exposición ó público.

Aberta quenda de intervencións, tanto o grupo popular como O BNG non fan uso da mesma.

Sometido o asunto a votación resulta:

- Votos a favor: catro (4), Sres/as Concelleiros/as do PP
- Votos en contra: cero (0)
- Abstencións: sete (7) Sres/as Concelleiros/as do PSOE e BNG.

Queda polo tanto aprobado por maioria simple o seguinte acordo:

**PRIMEIRO.-** Aprobar a Conta Xeral do Concello correspondente ó exercicio de 2014, nos termos e coa documentación que consta no expediente.

**SEGUNDO.-** Remitir dita conta ó Consello de Contas de Galicia e ó Tribunal de Contas, nos termos previstos na Regra 229 da Instrucción de Contabilidade Simplificada, así como á Delegación de Economía e Facenda.

### **4.- APROBACIÓN DOS FESTIVOS LOCAIS PARA O ANO 2016.**

O Sr. Alcalde antes de proceder a dar lectura á proposta da Alcaldía di que ainda que noutras ocasións pasadas , plantexaron a posibilidade de fixar como festivos locais as festas das distintas parroquias do concello , optouse por manter o criterio do anterior equipo de goberno por consideralo acertado :

Visto o escrito que a esta Alcaldía dirixe o xefe territorial da Consellería de Traballo e Benestar, no que interesa que antes do próximo 30 de setembro do actual ano se determine polo concello os dous días festivos locais para o ano 2016, non coincidindo ningún destes en domingos nin en ningún dos días sinalados como festivos autonómicos ou de ámbito estatal, propón que polo pleno da corporación se adopte o seguinte acordo:

**PRIMEIRO:** Fixar para a anualidade 2016 como días festivos locais:

- 9 de febreiro de 2016 (Martes de Entroido)
- 8 de agosto (Luns de Sta. María)

Aberta quenda de intervencións o voceiro do PP D. Tomás Rodríguez Arias, di que o seu grupo non vai intervir; e o portavoz do BNG , D. Óscar González Pardo considera boa a exposición de mantemento do criterio anterior, e engade que a posibilidade de fixar os festivos locais segundo as festas das parroquias pode ser problemático xa que hai parroquias que teñen incluso varias festas patronais. Di que poderíanse ter en conta outras datas como o a Festa de San Xoan cando non sexa festivo autonómico, ou San Isidro Labrador, patrón dos gandeiros.

O Alcalde di que ademais da dificultade sinalada polo voceiro do BNG, xa é unha tradición ter como festivos locais os días propostos.

A concelleira do BNG , D<sup>a</sup> María Do Mar Hermida Pico , responde que pouco tempo lle levou cambiar de idea.

Remata a quenda de intervencións o Alcalde manifestando que nun futuro o criterio pode variar.

Sometido o asunto a votación resulta:

- Votos a favor: nove ( 9) Sres/as Concelleiros/as do PSOE e do PP.
- Votos en contra: cero (0)
- Abstencións: dúas ( 2), Sres/as Concelleiros/as do BNG.

Queda polo tanto aprobado por maioria absoluta do número legal de membros da corporación o seguinte acordo:

**Fixar para a anualidade 2016 como días festivos locais:**

- 9 de febreiro (martes de Entroido).**
- 8 de agosto (luns de Sta. María).**

**MOCIÓN.-**

**Moción presentada polo BNG en defensa do Sector Lácteo, e Declaración de apoio ó Sector Lácteo Galego ( rexistro de entrada nº 785 e 786 de data 16 de xullo de 2015).**

Toma a palabra a concelleira do BNG D<sup>a</sup> María Do Mar Hermida Pico, para proceder á lectura de Declaración de apoio ó Sector Lácteo Galego, de acordo coa seguinte literalidade:

## **DECLARACIÓN de apoio ó Sector Lácteo Galego.**

### **EXPOSICIÓN DE MOTIVOS**

O Sector Lácteo Galego está a afrontar un dos peores momentos dos últimos anos. Levamos varios meses de caídas continuadas dos prezos en orixe que obrigan as explotacións a vender o seu produto por debaixo dos custes de producción e a afrontar importantes perdidas.

Os gandeiros e gandeiras do Concello de Xermade non son alleos a esta situación. Sofren nas súas explotacións caídas continuadas de prezo do leite e incluso se chegaron a dar casos de dificultades para que unha nova empresa se responsabilizara da recollida unha vez que á empresa anterior deixou de interesarlle.

Todo isto verase agravado nos vindeiros meses debido á escaseza de precipitacións e ao verán extremadamente seco que están a facer que as colleitas de herba e millo se vexan mermadas tanto en calidade como en cantidade.

### **SOLICITAMOS**

Que a Alcaldía de Xermade, previa consulta aos portavoces das forzas políticas representadas neste Concello, adopte a seguinte

### **RESOLUCIÓN**

- 1.- O concello de Xermade manifesta publicamente o seu compromiso coa defensa do sector lácteo, co dereito a producir dos e das gandeiras galegas, coa garantía da recollida do leite a uns prezos xustos en orixe, para asegurar a permanencia e a recuperación dun sector vital para a economía do noso Concello.
- 2.- O concello de Xermade apoia as mobilizacións que o sector leiteiro organice en defensa dos seus dereitos e intereses e pon á súa disposición os medios de transporte necesarios para poder reclamar as súas xustas demandas.

Xermade, 15 de xullo de 2015

Rematada a lectura, a concelleira pregunta en primeiro lugar por qué non houbo apoio por parte do equipo de goberno nin presenza na manifestación celebrada en Santiago de Compostela para apoiar o sector lácteo , nin foi convocada a Xunta de Portavoces do Concello de Xermade, para tratar o tema .

O Alcalde responde que iso non é verdade, xa que o concelleiro D. Carlos Alberto Guerra González foi en representación do Concello de Xermade, por presidir persoalmente os premios do certame de Xermade na Historia. Dº María do Mar di que o apoio e moito más que asistir a unha manifestación , e o Alcalde expón que falou co Concello de Guitiriz para que os veciños de Xermade interesados na manifestación puidesen acudir á mesma, cos veciños de Guitiriz, comunicóuselle aos medios de comunicación e convocouse aos gandeiros; pide desculpas por se as medidas tomadas foron insuficientes e por non avisar aos voceiros dos distintos grupos políticos; di que non considera axustada a realidade á acusación de non apoiar ao sector, tendo incluso experiencias persoais e familiares co mesmo .

A concelleira do BNG, procede a dar lectura a MOCIÓN DE DEFENSA DO SECTOR LÁCTEO que literalmente di;

#### **MOCIÓN en defensa do Sector Lácteo.**

##### ***Exposición de motivos.-***

A situación do sector lácteo en Galiza a día de hoxe pódese cualificar de dramática. Após o inicio desta campaña, a primeira logo da desaparición das cotas lácteas e en que a produción fica totalmente liberalizada, a situación en Galiza estase volvendo absolutamente insostíbel para as explotacións.

A ausencia de adopción de medidas e de decisións políticas por parte do Goberno Galego e do Estado para preparar o sector para poder competir neste novo escenario está provocando consecuencias desastrosas.

Levamos varios meses de caídas continuadas dos prezos en orixe que obrigan as explotacións a vender o seu produto por debaixo dos custes de produción e a afrontar importantes perdas. Esta situación deriva da nula capacidade de negociación para os e as gandeiras que se ven sometidas aos ditados das grandes multinacionais da industria que, como xa denunciou mesmo o Tribunal da Competencia, estableceron un complot para provocar esa baixada de prezos, sen que o Goberno move un dedo para defender o sector ou protexelo ante esa situación.

Esta práctica ten consecuencias especialmente graves en Galiza, onde actualmente xa se están asinando contratos por debaixo dos 20 céntimos.

Por outra banda, xa desde o Bloque Nacionalista Galego, vimos denunciando desde hai meses que, coa liberalización do sector, na práctica as industrias son as que establecen agora as novas cotas á produción, deixando totalmente

desvalido o sector produtor. Así, mentres no resto do Estado español e da Unión Europea se está a incrementar a producción, en Galiza estanse establecendo mecanismos de restrición. As industrias son as que determinan, canto, cando e onde se pode producir leite. Esta dinámica vese ademais reforzada pola falta de acción e intervención dos gobiernos galego e estatal, que fican impasíbeis a pesar da gravidade da situación que pode condicionar non só o presente do sector, senón o seu futuro e viabilidade a longo prazo.

As consecuencias máis graves deste feito comezáronse a percibir de forma más estendida nos últimos días. Tanto algunha industria como algúns primeiros compradores deciden unilateralmente, sen previo aviso e incumprindo os contratos asinados, que deixan leite sen recoller nas explotacións. Isto provoca, obviamente, unha situación terribel por tratarse dun producto perecedoiro que está obligando, en moitos casos a tirar o leite, xa que existen mesmo dificultades para atopar quen llelo recolla case que "regalado".

De se manter esta situación durante máis días pode acabar por ser irreversibel para moitas explotacións que, na maioría dos casos, levan meses botando mados aforros para poderen manter a producción neste contexto de prezos.

O sector lácteo é a columna vertebral da economía rural, mesmo da persistencia de vida no rural en moitas comarcas. Non podemos consentir que peche nin unha explotación máis.

Non podemos seguir agardando, vendo como se esfarela un sector punteiro e viável, sen que se tomen decisións urxentes para atallar a situación.

Por estas razóns o Grupo Municipal do Bloque Nacionalista Galego solicita do Pleno da corporación municipal a adopción do seguinte:

### **A C O R D O**

- 1. O Concello de Xermade comprométese firmemente coa defensa do sector lácteo, co dereito a producir dos e das gandeiras e coa garantía de prezos en orixe xustos, para o cal adoptará posicións e demandas públicas contundentes na consecución destes obxectivos, situándose do lado do sector produtor asumindo as súas demandas nesta crítica situación.**
- 2. Instar ao Goberno Galego e ao Goberno do Estado a fin de que a través de todos os mecanismos de que disponan apremen ás industrias e aos primeiros compradores a garantir a recollida de todo o leite que se produza nas explotacións galegas.**
- 3. Instar ao Goberno Galego a que garanta a percepción dun prezo do leite en orixe xusto e que cubra os gastos de producción para o cal se adoptarán as seguintes medidas:**

- a) Crear un instrumento interprofesional de negociación e decisión**

coa participación do sector produtor, industria e distribución, actuando a administración como mediadora e catalizadora de acordos e velando polo cumprimento destes.

- b) Estabelecer, nese ámbito, os criterios e indicadores sobre os que debe construirse a cadea de valor do leite e, por tanto, o prezo a percibir polos produtores e produtoras que, en ningún caso, poderá ser inferior ao de producción, así como os mecanismos para garantir a recollida da producción.
- c) Reclamar a modificación do Real decreto 125/2015 coa finalidade de introducir mecanismos que garантan a posibilidade real de negociación entre produtores e industrias das condicións contractuais; mecanismos de garantía de recollida de producción, así como do volume e marxe de tolerancia, así como de instrumentos de mediación e vixilancia de cumprimento das condicións de negociación e cumplimentos contractuais.
4. Urxir ao Goberno Galego a que realice unha campaña de inspección no ámbito das súas competencias, e instar ao Estado a que faga o propio no ámbito das súas, para perseguir e sancionar as prácticas de *dumping* nas grandes áreas de distribución evitando a banalización do leite e a súa utilización como elemento de reclamo mediante a súa venda a perdidas.

Xermade, 15 de xullo de 2015

O Alcalde di que o grupo socialista municipal está de acordo co contido da moción por ser dano que sofren os gandeiros polo prezo tan baixo do leite , e concede a palabra ó concelleiro do PSOE D. Carlos Alberto Guerra González, quen comeza dicindo que o equipo de goberno apoia a moción, aínda que inicialmente preparou outra moción alternativa con matices diferentes, considera mellor estar unidos e non facer como noutros concellos onde presentaron mocións alternativas e simplemente di que hai que velar pola unión co sector lácteo, gandeiro e forestal por ser a principal industria e polo tanto facer todo o posible por salvalo ata que chegue o momento no que exista un reenganche de poboación que queira vivir dos mesmos. O sector lácteo non é un traballo exclusivamente, se non que é unha forma de vida . Ten en consideración outros puntos de vista que involucran a todas as administracións públicas. Por un lado o Estado; debe renovar o Sistema Europeo de Intervención no Mercado, presionar para que non se baixen tanto os prezos ; e di que hai que estar as duras e as maduras cando baixen e tamén cando suban os prezos. A nivel autonómico, a Xunta debería relanzar o sector lácteo xa que Galicia produce un 40% do total da producción nacional ; e da devandita porcentaxe soa a un 20% se lle saca un valor engadido, e o restante 80% non se aprecia , e ahí onde a administración debe tomar medidas para revalorizar a

producción láctea. E por último destacar o papel da administración local, dos concellos que deben fomentar a educación do consumidor , potenciar que os mesmos coñezan e valoren qué produtos consumen , e o seu orixe .

Por outra banda , e en relación co disposto no Real Decreto 125/2015, sería importante facer contratos atendendo aos prezos europeos, tendo en consideración unha serie de índices ; outra cousa é o “ Dumping”, práctica comercial discriminatoria consistente na venda dun mesmo produto a prezos diferentes en distintos mercados; consiste en vender nos mercados exteriores un producto a un precio inferior ao dese mesmo producto no mercado interior e incluso por debaixo do coste de producción, cando non é posible darlle saída a ese producto a un prezo que lle permita ao seu produtor obter un marxe comercial razoable.

Toma a palabra o voceiro do PP D. Tomás Rodríguez Arias , sinalando que nesta problemática hai dúas claves: o custe de producción e o prezo de venda. Lembra que nesta materia sempre se está batallando , xa que cando hai un prezo rendible a xente non se queixa , pero cando baixa ponse o grito no ceo . Está claro que se deben cubrir os custos e que a clave está en que todas as partes implicadas velen por facer competitivo o sector, destinando a dita finalidade o importe das subvencións , rendibilizando as súas explotacións, xa que se venden o leite por debaixo do custo de producción os gandeiros arruinanse . Di que este é un tema sensible, polo que a administración debe facer forza de intermediaria fronte aos que se queren aproveitar desta problemática, pero de novo destaca que todas as partes deben poñer da súa parte . Manifesta que o seu grupo vai apoiar a moción.

Facendo uso da quenda de intervención, a concelleira do BNG Dª María do Mar Hermida Pico di que non vai entrar en debates pero que o PP sempre vota a culta a quen non a ten . Por alusións, o voceiro do PP di que non lle vota a culpa da crise aos gandeiros, únicamente fixo referencia a que todas as partes involucradas no sector teñen responsabilidades xa que as administracións deben controlar que a contía das subvencións outorgadas se destinan a finalidade para a que foron concedidas. A concelleira lamenta ter que oír a conselleira do Medio Rural, Dª Rosa Quintana dicindo que as familias do sector afectado pola crise do sector lácteo teñen que aguantar, xa que no noso territorio se pechan as explotacións gandeiras , agrícolas e inclusive as mariñas, é o punto e final porque son a fonte principal de ingresos en Galicia, non sendo ningún dos mesmos sectores elitistas .

D. Tomás Rodríguez Arias, en relación co argumento anterior di que precisamente os sectores da gandería e pesca foron as actividades mais subvencionadas durante moito tempo , pero como xa dixo anteriormente a culpa non é dos produtores exclusivamente por non destinar as subvencións a rendibilizar as explotacións , se non tamén das administracións por non velar polo cumprimento da finalidade ou destino dos fondos públicos.

O Alcalde pide engadir ó contido da moción , o apoio ó sector cárnico tamén moi castigado e que ten a mínima marxe de beneficios. Comunica que o vindeiro 20 de setembro hai prevista una tractorada para apoiar o sector

lácteo e previsiblemente despois convocarán unha folga xeral e outra serie de mobilizacións.

Sometida a votación, a mociones resulta aprobada por unanimidade dos membros presentes.

### **ROGOS.-**

- O BNG pide que cando o Concello organice dúas actividades paralelas se teñan en conta os espazos para que non coincidan en tempo ou lugar; fala do caso do día 14 de agosto , xa que o pavillón será utilizado para a celebración da Festa dos Maiores e ó mesmo tempo hai prevista a Festa de final do campamento xuvenil, cun número elevado de nenos, concretamente cincuenta e cinco, que van levar a cabo varias actividades no mesmo pavillón. Pide maior coordinación para evitar situacions similares.

O Alcalde di que foron dúas actividades organizadas por persoas distintas: a traballadora social e a educadora de familiar e non estaba previsto que foran intervir , xa que a celebración da festa do fin de campamento vaise celebrar no pavillón por motivos meteorolóxicos , non previstos, e a Festa dos Maiores xa estaba en marcha. D<sup>a</sup> María do Mar Hermida responde que hai que prever esas cousas e mais en Galicia por cuestiós obvias,

### **PREGUNTAS.-**

O portavoz do grupo popular municipal formula as seguinte preguntas:

- Porqué se baixou o importe do premio do segundo certame Xermade na Historia?

O Alcalde responde que a intención foi a de ir axustando, por tema de ir baixando a débeda.

D. Tomás Rodríguez Arias, di que non o comprende xa que se trata dunha convocatoria para o ano 2016, no que o Concello de Xermade contará cos mesmos ingresos propios, e con maiores ingresos por subvencións, entre outros polo aumento importante que vai implicar as subvencións para gasto corrente no SAF, teleassistencia e outras a conceder pola Deputación Provincial; polo que considera que a finalidade da medida é a despréstixiar o certame, que tivo gran éxito na primeira edición, con grandes traballos presentados e importante transcendencia incluso nacional, o cal supón un éxito dende o punto de vista cultural; Di que en relación co argumento manifestado como resposta, e dicir a débeda, quere formular a segunda pregunta, o estado da débeda, deixando constancia da súa disconformidade coas informacions vertidas polo grupo socialista , e concretamente polo concelleiro D. José Prieto Barro, manifestando que o anterior goberno deixou moi endebedado o Concello , xa que o único préstamo que ten o concello ven de moitos anos atrás e non chega aos trinta mil euros. Di que esa é a única débeda e non a póliza de crédito que concertou o ano pasado para pagar aos provedores , e que non ten natureza de préstamo e que se quere se pode cancelar en calquera momento. Di que non pode soportar esas acusacions porque non son reais,

e lembra ó sr. Alcalde que este trimestre entrarán subvencións, e os fondos do estado e que se quere cancele a operación de tesourería , xa que as facturas dos provedores poden esperar.

O Alcalde, en relación coa baixada do importe do premio alega que hai moitas carencias no concello , carencias en servizos básicos como abastecemento de auga, asfaltado de pistas etc.. e di que hai que priorizar o gasto , e atender en primeiro lugar necesidades básicas; di que este ano o concello tivo que asumir con fondos propios unha parte importe do gasto do campo de traballo Casa da Neveira ; e di que o que a Deputación concede ten unha finalidade e non se pode destinar a outras cousas.

O concelleiro do PP D. Antonio Riveira Requeijo propón a posibilidade de facer o premio con carácter plurianual para paliar o recorte do premio de Xermade na Historia

A concelleira do grupo popular D<sup>a</sup> Isabel Campello Ares, critica que se rebaixe o premio, aproximadamente dous mil euros, reducindo o gasto en cultura e sen embargo o alcalde propoña aumentar beneficios propios, como as dietas ou asistencias aos órganos colexiados.

O voceiro do BNG D. Óscar González Pardo di que está de acoro coa concelleira D<sup>a</sup> Isabel Campello Ares, que o BNG xa fixo unha proposta de reducir o importe das asistencias, e que coa subida das asistencias poderíase deixar o mesmo importe para o certame . Aproveita tamén para dicirlle ó Alcalde que non va permitir que diga que o BNG únicamente está para importunar, o que faga comentarios como que o BNG non apoia os obradoiros de emprego; o que fai o BNG é desenvolver o seu traballo.

O Alcalde responde que non fixo tal afirmación, e o voceiro do BNG di que o dixo nunha entrevista de radio e que o ten gravado. O Alcalde di que non o lembra, que sería un lapsus.

Por alusións toma a palabra o concelleiro D. José Prieto Barro , e di que nunca falou con ninguén de iso, que non é verdade; tamén o alcalde di que non é verdade tal acusación.

D. Tomás Rodríguez Arias, formula a seguinte pregunta:

- Para que se están usando as Brigadas de Incendios?

O voceiro do PP di que as brigadas de incendios teñen que desenvolver labores de prevención , extinción de incendios , traballos de desbroces forestais ... e que reciben unha subvención cofinanciada por fondos europeos , polo que hai que xustificala adequadamente, por ser ordes especialmente estritas.

A concelleira do BNG expón que o seu grupo vai formular unha pregunta similar, polo que o Alcalde di que vai contestar despois as dúas.

A última pregunta do grupo popular é a seguinte:

- Cal é a finalidade de constituir un grupo de voluntariado por parroquias? Vai mesturalo co grupo de protección civil do concello ou vai destinalo a outra finalidade?

O Alcalde di que o devandito grupo de voluntariado vai por separado da brigada de protección civil; que con esta medida se trata de fomentar e crear un grupo de apoio altruista ante determinadas problemáticas por parroquias: problemas puntuais , emerxencias, asesoramento as brigadas sobre a ubicación de determinados lugares etc... pero que en ningún caso se van solapar.

D. Tomás Rodríguez Arias, di que formula a pregunta pola colocación de bandos nas distintas parroquias solicitando a participación da poboación neste tipo de grupos e que xa que existe un grupo de protección civil, legalmente constituído para o que recentemente a Xunta de Galicia concedeu un vehículo, habería que potenciar o seu papel.

A concelleira do BNG María do Mar Hermida Pico di que o Alcalde pide aos veciños colaboración altruista , di que o concello está arruinado e ainda así vai cobrar un soldo de vinte e dous mil euros anuais. O Alcalde responde á concelleira dicindo que non faga demagogoxia , e D<sup>a</sup> María do Mar Hermida pregunta ónde está o cartel do horario de atención ó público, xa que non ten claro o horario que dedica a atender aos veciños. O Alcalde di que fai o horario que fixou , de vinte e cinco horas semanais.

O voceiro do BNG D. Óscar González Pardo , procede a formular as preguntas do seu grupo:

- Un ano máis fixose a convocatoria para a contratación das brigadas antiincendios. Dende que rematou o proceso de selección ata que comenzaron a traballar o 1 de agosto (aínda que estiveron contratados o 31 de Xullo porque senón perdiase a subvención) estiveron sen material **polo exposto, este GRUPO POLÍTICO formula as seguintes preguntas:**

- |  |
|--|
| <ul style="list-style-type: none"> <li>▪ Como é posible que non se cumpra a normativa de seguridade?</li> <li>▪ A día de hoxe, dispón a brigada de todo o material? Xa ten portófonos?</li> <li>▪ Cal é a función da brigada? (Limpar a praza do Concello? Estar separados?).</li> <li>▪ Coa seca que hai, ve responsable limpar a praza do Concello e a Casa do Concello con auga a presión? Cantos litros de auga gastou?</li> <li>▪ Visto os traballos que está a levar a cabo a brigada, vémonos na obriga de preguntarlle ao concelleiro de Medio Rural se coñece o PLADIGA e se nos pode explicar un pouco en que consiste?</li> </ul> |
|--|

O Alcalde responde que a Brigada de incendios está para labores de prevención e extinción de incendios, que o que fixeron na praza foi unhas prácticas coa mangueira e aproveitaron para limpar a praza; di que ademais de recibir subvención para as brigadas o concello tamén aporta fondos propios e polo tanto non ve mal que realicen algúun traballo en beneficio de todos os veciños. Sobre os litros de auga que se gastaron, o alcalde di que entorno a mil litros, e a concelleira do BNG D<sup>a</sup> María do Mar Hermida di que ela viu que cargaron a mangueira seis veces .

En relación coas medidas de seguridade o Alcalde di que a brigada ten de todo, é posible que lles falte algúun equipo de protección individual (EPI) . Respecto o feito de estar separados, di que foi algo puntual, unha mañá, e nunca en situacións de risco, non se lle ocurriría mandalos por separado a desenvolver labores de extinción ;

A concelleira do BNG di que a finalidade da brigada municipal de incendios é a de reforzar as labores de prevención e extinción de incendios, non outras labores municipais non relacionadas coa mesma, como limpeza de rúas, beirarrúas, xanelas etc... e ademais teñen que ter medios de seguridade ; non pode estar un peón da brigada traballando nun talude , cunha rozadora sen portófono , sen supervisión de ningún tipo. Remata dicindo que a brigada pudo comezar a funcionar o 1 de xullo e comezou o 1 de agosto.

O Alcalde responde que as brigadas están para o que están e que van cumplir cos requisitos esixidos de rozar unhas determinadas hectáreas ; en relación ó PLADIGA , di que basicamente é un Plan de defensa contra incendios , coas medidas a adoptar de prevención e extinción, pero que non ten porqué coñecer o contido íntegro do mesmo.

D<sup>a</sup> María do Mar Hermida Pico, expón que o PLADIGA explica as labores das brigadas contra incendios , e que son labores forestais para a prevención de incendios e extinción dos mesmos; manifesta que se o que quiere e que desenvolvan outros traballos ou servizos que non solicite brigadas de incendios se non peóns ou operarios de obras .

A concelleira do grupo popular D<sup>a</sup> Isabel Campello Ares lémbraelle que usar diñeiro público para finalidades distintas das autorizadas , pero quere deixar claro que non quere decir co anterior que o concello teña cometido delito algún.

O Alcalde responde que fixo unha consulta sobre a posibilidade de levar a cabo outras funcións, cumprindo claro está co requisito mínimo de hectáreas desbrozadas e non habendo incendios nin necesidades de auxilio ou asistencia.

D. Tomás Rodríguez arias di que compe ter moito coidado si hai unha denuncia por facer traballos que non lles competen , xa que incluso se podería perder a subvención.

- O pasado 14 de Xullo o señor alcalde chamounos ás 12:10 do mediodía porque ás 13 horas ía vir a directora Xeral de Xuventude visitar o campamento que se estaba desenvolvendo na Casa da Neveira en Lousada. Agradecemos a chamada pero **polo exposto**,

**este GRUPO POLÍTICO presenta a Vde. as seguintes preguntas:**

- **Vainos chamar sempre con tanta antelación?**
- **Podería a concelleira de cultura explicarnos como foi esa visita?**
- **Sabemos que o 17 de Xullo, como remate do campamento, se organizou unha cea de despedida. Quen a organizou? Cal foi o custo desa cea de confraternización? Cal foi o criterio de selección dos asistentes?(Por que non se avisou a todo o mundo? Por que hai xente allea ao Concello e non está a oposición e se despreza parte da corporación municipal?).**

O Alcalde pide disculpas se non avisou coa suficiente antelación, e en relación coa cea do día 17 de xullo sinala que únicamente foi a despedir ó persoal; di que o encargado da organización xeral do campo de traballo foi o técnico de emprego , e descoñece o custo da cea, nin se foi unha invitación; e respecto as invitacións e o criterio das mesmas di que non invitou a ningúen , e que incluso cando chegou foi el quen pagou as consumicións dos asistentes.

- Hai dúas semanas comenzaron os desbroces nas pistas do concello **polo exposto, este GRUPO POLÍTICO presenta as seguintes preguntas:**

- **Que criterio se segue para elixir que lugares se desbrozan e cando?**
- **Supervisa o concelleiro de obras estes traballos?**
- **É necesario estragar peches privados para levar a cabo o desbroce das pistas?**

O Alcalde responde que o criterio seguido para comenzar os traballos foi o das festas patronais , polo que por andar apurados algunas pistas non quedaron ben e foron repasadas con posterioridade.

D. Óscar González Pardo di que algunha das pistas non quedou ben , como o caso de Piñeiro, e noutras causáronse danos aos veciños nos peches privados das fincas, nos mirtos etc.. polo cal pide que a empresa teña mais coidado.

O Alcalde di que existe supervisión polo concelleiro de obras e do medio rural, e que polo momento no tivo entrada no concello queixa algunha sobre danos causados .

- Sabemos que o pasado 2 de xullo arredor das 9 da noite se reuniu o Grupo Socialista na casa do Concello **polo exposto, este GRUPO POLÍTICO presenta as seguintes preguntas:**

- **Vaille facilitar á oposición un local de reunións como é perceptivo?**
- **Poderemos utilizar a casa do Concello coma vostedes?**

O Alcalde contesta que tiveron unha reunión como equipo de goberno para tratar asuntos municipais e consideraron mellor reunirse na casa consistorial que no bar; di que o concello é un edificio público e pode utilizarse para celebrar reunións polos distintos grupos municipais habendo disponibilidade, e propón que se podería celebrar outros edificios públicos, como a nave. O voceiro do BNG pregunta , se polo tanto van poder reunirse o resto de grupos ás nove da noite, e responde o Alcalde que mellor noutro horario.

O portavoz do grupo popular di que dadas as características da casa consistorial non hai disponibilidade de locais para os grupos políticos, pero para ningún.

- O pasado 28 de Xuño tivo lugar a segunda edición do Northwest Riman que atravesou varias parroquias do concello **polo exposto, este GRUPO POLÍTICO presenta a Vde. as seguintes preguntas**

- **Que información se transmitiu á veciñanza?**
- **Que medidas de seguridade se adoptaron?**

O voceiro do BNG , D. Óscar González Pardo, di que a sinalización foi moito pero nesta edición que o ano pasado , e que é responsabilidade do concello velar pola seguridade dos veciños , polo menos cando se corten vias ; ademais considera esaxerado tantos cortes de vias como houbo, co conseguinte prexuízo que supón para os comercios, por cortalas durante todo o día.

O Alcalde recoñece que ten razón, que tamén considera excesivos os cortes de tantas vias coas consecuencias que implica.

- Na pasada lexislatura presentamos un rogo para que se revisara o estado das vivendas abandonadas e con risco de derrubamento do concello.

**Polo exposto, este GRUPO POLÍTICO presenta as seguintes preguntas:**

- **Sabe vostede se se fixo esta revisión?**
- **Se non foi así, ten previsto facer unha valoración do estado destas vivendas?**
- **(O mes pasado os veciños de Momán valizaron unha vivenda no Campo da Feira con risco de derrubamento sobre a beiraría, existen outras dúas unha na Casanova en Roupar e outra no Chao en Cabreiros).**

O Alcalde di que non coñece os expedientes urbanísticos abertos en materia de declaración de ruína , que tería que consultalo co arquitecto municipal, pero di que haberá que tramitar os pendentes en marcha.

- A parroquia de Momán leva días con problemas na traída de auga municipal **polo exposto, este GRUPO POLÍTICO presenta as seguintes preguntas:**

- **Hai prevista algunha actuación para evitar problemas coa auga que tiveron lugar anos pasados e previsiblemente se verán agravados pola seca deste verán?**
- **Que solución ofrece o concello a este problema?**
- **Ademais dos problemas citados na parroquia de Momán, no día de onte a auga pública no Pedreiro presentaba un aspecto turbio e un intenso olor a cloro. Ten constancia vostede deste problema?**

O Alcalde di que o mantemento de auga e rede de sumidoiros o leva unha empresa, concretamente Miragaya, e xa está o tanto da problemática existente e vai levando a cabo traballos e arranxos de avarías. Engade que a maiores na parroquia de Momán hai outros problemas de índole eléctrico. Pide aos grupos políticos colaboración nesta materia , comunicado ó concello as avarías e problemáticas das que sexan coñecedores.

Dª María do Mar Hermida Pico, pide que se esixa a empresa que cumpra estritamente co estipulado no contrato, e que se ten traballo atrasado terá que facelo, xa que cobra unha importante cantidade de diñeiro do concello.

Trala quenda de preguntas, o concelleiro do grupo socialista municipal , D. José Prieto Barro pide expresamente que conste en acta que non falou sobre as contas do concello e que cando xurdan comentarios deste tipo se lle digan persoalmente .

Rematadas as intervencións, e non habendo máis asuntos que tratar, o Sr. Presidente levanta a sesión, sendo as vinte e unha horas e vinte e dous minutos do expresado día. Autorízase a presente acta coa sinatura do Alcalde e da Secretaria que da fe.



Asdo.- Roberto García Pernas.



Asdo.:Ana Elena Fernández del Valle